

愚

齋

存

稿

愚齋存稿卷第五十九目錄

電報三十六

寄漢口鄭蘇堪觀察

濟南周玉帥來電

寄京外務部

寄濟南周玉帥

寄美京伍大臣

寄京那琴軒侍郎

寄京外務部

又

香帥自南京來電

寄津護督吳仲帥

寄開封袁宮保

寄江甯張宮保

開封袁宮保來電

寄京外務部

又

開封袁宮保來電

寄袁宮保

信陽袁宮保來電

寄京外務部瑞鼎臣左丞顧康民右丞

外務部瑞顧兩丞堂來電

寄津袁宮保甯張宮保

寄王中堂

京陸鳳石總憲張冶秋尙書來電

寄京外務部

又

外務部來電

寄津袁宮保

袁宮保來電

又

寄京陳瑤圃侍郎

寄天津袁宮保江甯張宮保

濟南周玉帥來電

王中堂來電

袁宮保來電

寄袁宮保

又

寄外務部

寄天津袁宮保江甯張宮保

寄張宮保

張香帥來電

袁宮保來電

又

沈子梅觀察上袁慰帥電

袁宮保復沈道電

袁宮保來電

張宮保來電

寄張宮保

張宮保來電

寄外務部

張宮保來電

外務部來電

寄長沙俞中丞

寄張宮保

張宮保來電

寄袁宮保

寄張宮保

外務部來電

寄外務部

又

外務部來電

袁宮保來電

寄張宮保

又

張宮保來電

張宮保致軍機處電

寄張宮保

寄袁宮保

寄京外務部津袁宮保吳侍郎

袁宮保來電

袁宮保吳侍郎來電

寄袁宮保

寄外務部

寄張宮保

愚齋存稿卷第五十九

電報三十六

寄漢口鄭蘇堪觀察

光緒二十八年十月初一日

豔電藉知香帥力陳鐵路不可易人至深銘感頃奉電旨仍令一手經理事屬公司原非奪情可比然辦事全在用心方寸已亂斷難周密一也現有路礦大臣可以督辦不知者謂我戀棧內疚寸心外慚清議二也近來洋人更難駕馭廠礦款絀尤屬堪虞此時不脫卸死而後已三也有此三端仍電懇香帥薦賢爲代知我愛我如公務求切實代陳由衷之言天日可誓立盼示覆

濟南周玉帥來電

十月初二日

濮州行次奉敬電曷勝驚悼公純孝性成望爲

國保身勿過哀毀振捐萬兩東民感念不忘電奏
語畧不足闡揚擬卽疏稱先德並擬博采遺行詳
達 天聰候 旨施恩餘電緝庭

寄京外務部

十月初二日

中俄接綫展限續約已繕好查光緒十八年接綫條約
係李中堂與喀希尼畫押二十二年二十四年續約係
總署畫押三月內已鈔送此次若須貴部畫押請速電
復當將洋漢文繕本齎送丹英兩公司借綫合同已均

訂安只須候英電商局便可與該公司畫押擬一起呈
請貴部批定宣懷已將庚子年籌款由大東北代造海
綫及天津陸綫以通要報現議借綫方能收回代造京
津之綫各緣由奏明在案此次畫押請貴部代奏以歸
簡捷乞電示

寄濟南周玉帥 十月初四日

承賜唁並蒙允博采遺行疏達 天聰感深涕泣惟山
東非先嚴服官省分似只能就捐振著筆帶敘平生善
舉懿行亦不敢希叨 優典二十七年陶方帥奏捐銀
五千兩以上者請 旨特賞匾額嗣有順德縣紳士候

選治中蘇銘璋捐銀五千兩請賞給該紳等蘇姓合族
祠堂匾額一方又捐銀五千兩請賞給該紳等故父候
選郎中蘇又震祠堂匾額一方均奉 旨照准此次捐
數較鉅先嚴銜階較崇如蒙援案請 賞給先嚴祠堂
匾額一方亦足以表彰先德感激私忱何可言喻除鈔
案交緝庭寄呈外謹先電求

寄美京伍大臣

十月初八日

美約大概公宜與外部商妥到華易定湘潭鐵路美本
逾期如再遲疑不定萍鄉運煤要緊只得歸煤礦另造
本許禮和美不造則歸德造乞告栢生士

寄京那琴軒侍郎

十月初八日

路礦關係大局將來鐵路借款必須如期歸還方能收回自理專賴路利勢恐不敷非賴礦利補助殊無把握月前瀝陳集股特設勘礦總公司保守礦地主權一摺已蒙 俞允又請官商合辦先撥剩捐十萬以充官股一片批交貴部議奏此事如果辦理得法必能爲 朝廷籌鉅款所惜開辦稍遲佳礦大半爲外人所佔可勝痛惜宣懷已遭大故本不當再預國事兩承 恩旨仍着經理鐵路總公司昨又瀝陳前情懇電香帥籲請銷差以免罪戾勘礦總公司華商正在開辦全仗大力主

持並乞熟商各堂官股或准或駁先行電示以便傳諭
公司遵照

寄京外務部

十月初八日

東電福公司請修懷浦鐵路亦願照正太辦法歸盧漢
訂立合同以期互得利益沙多十月杪由比回滬當與
熟籌誠能互益不礙幹路有何不可惟正太係盧漢枝
路有益無損懷浦則錯綜前後橫直並行勢必有損在
此法只要借款保還在中國恐本利無着自當執定互
得利益四字斟酌和商屆時擬約哲美生來滬面議再
請部示酌定

又十月初九日

借綫合同大東所索利益已由敝處密電英總公司轉
商英外部電囑英使收回所索之款尙須候一英電便
與北東兩公司同日畫押卽將中俄接綫約本一併呈
送貴部分別畫押核准

香帥自南京來電

十月初十日

鄭道出示台電屬代奏懇辭路廠一節鄙人前既
奏留未便代請且奉 旨留辦倚任甚重不宜固
辭

寄津護督吳仲帥

十月十一日

已飭盧漢華洋工司協助 西陵欽工但據電稟岔
道應安何處並轉運材料以及將來行車如何章程自
應妥議請卽派員與鄭道清濂商辦敝處已飭該道遵
照

寄開封袁宮保

十月十三日

宣懷奏辭路差奉 旨仍遵 前旨所請毋庸議欽此
感悚之下伏念時艱不敢再瀆幸有公與香帥督其成
一切俟公到滬面商長策頃接津電輪電兩局將派燕
謀侍郎督辦開平華商正在聚訟輪電股商聞此消息
票價頓跌難保不轉賣外人查輪電發端於北洋宣懷

係文忠所委並非 欽派甲申馬建忠將輪局賣與旗
昌宣懷收回後公款全數還清悉歸商辦電綫則因英
丹侵入內地與各國訂立合同庚子南北音斷借款特
造海綫並託大東北代造京沽陸綫現已議收回二十
餘年不過堅忍辦事而已至於利息盈虧皆股商受之
局外不知輒以獨攬利權爲詬病時局如此亦甚願藉
此卸肩公督辦商務此爲中國已成之局公旣意在維
持願勿令其再蹈閭平覆轍伏乞主持公論速電畧相
俟公到滬面商再定辦法並望速復

寄江甯張宮保

十月十三日

佳電蒙慰勉兼至感悚之下伏念時艱自當仰體淵衷不敢再瀆頃接津電輪電兩局將派燕謀爲督辦信有此說廠礦必致受擠不得不懇求一氣脫卸以免潰散開平華商正在聚訟輪電股商聞信票價大跌難保不暗售外人公督辦商務此係已成局面殊爲中國惜之查宣懷創辦輪電係李文忠所委並非欽派船局經馬建忠賣與旗昌宣懷收回後還清公款悉歸商辦電局因英丹侵入內地與各國訂約庚子南北音斷借款特造海綫並託大東北代造京沽綫現正議收回二十餘年堅忍辦事而已至利息盈虧皆商股受之比來輒

以利權獨操爲眾指目亦甚願藉此卸肩時局如此文
忠忠誠去後公獨任天下之重心所謂危不敢不告乞
鈞示

開封袁宮保來電

十月十七日

兩元電感悉留候接局鄙人斷不謂然在津伊曾
勸北洋收回辭以不暇兼顧因而自謀亦在意中
然內未必予之當電京阻止

寄京外務部

十月十九日

兩公司借綫合同已於本日畫押連中俄接綫合同均
於今晚專差呈送

又十月十九日

皓電命將改定展限續約全文電陳查約文係照五月十八咨行俄使所擬底稿酌改第一條內或該中國電局與該公司改爲或中國電局與大北公司第三條內倫敦公會之後訂定一語改爲倫敦公會之後由兩國國家訂定第四條內所讓與丹國公司之電綫一語讓字改爲借字餘照原文未動

開封袁宮保來電

十月十九日

頃由津電來柯鄭孫道等交到接修

西陵岔

道條約十三款儼然敵國惟京榆係官軌盧漢路

亦係部款建修該道等似不應如此爲難請轉飭
該三道從速妥辦倘誤 欽工責有攸歸餘俟弟
回津後酌辦

寄袁宮保

十月二十日

奉巧電已嚴飭柯鄭孫三道不准聽普意雅所言宣閱
所擬各條在普仍多誤會早經痛責先令勘辦岔道已
詳皓電聞比法銀公司因英阻其達津頗忌英工司宣
已經電比國告以官路彼此不得過問公謂盧漢係部
款建造可謂扼要實則借款亦同部款也路礦大端輒
爲外人把持公來正當切實面商以防流弊

信陽袁宮保來電

十月二十三日

皓號三電悉感謝至鄂遵停半日瞻仰鐵廠餘容

面罄

寄京外務部瑞鼎臣左丞顧康民右丞

十月二十八日

頃某國總領事面稱接使館電中國將輪船招商局售
歸英國瑞典國代辦將定議日本亦願代辦等語答以
絕無此說該領事云既有來電事必有因切託電詢貴
部是否有洋商密議抑屬空談乞查示

外務部瑞顧兩丞堂來電

十月二十九日

勘電所言招商局事本部並無所聞自係訛傳

寄津袁宮保甯張宮保

十一月初五日

庚子年大東北代辦京津沽電綫已於本月初二日收回摘去英丹國公司招牌換用中國電局牌名報紙照常辦理

寄王中堂

十一月初六日

慰帥述定興欲將招商局歸入戶部籌餉謂無是理並告沈子梅商局創自北洋擬奏請仍由北洋維持以重商務云云若仍如從前北洋不過會委總辦毫不掣肘將也

京陸鳳石總憲張洎秋尙書來電

十一月初九日

先德祠匾圈出遺惠流聞四字

寄京外務部

十一月十一日

道勝銀行佛郎威函稱璞科第電開道勝銀行欲將其
所訂正太鐵路合同讓歸法國承辦鐵路工程並行車
公司云又據巴黎電稱該法國公司係按照承辦蘆漢
鐵路比公司章程設立辦理並逕派工程人員來華云
敝行各董事以此舉必邀允准並囑請准前來乞早示
復此節雖未經載入合同然係合例之事況法國公司
在華應辦之事仍由道勝銀行代爲料理等語卽已函
復來函藉悉貴行欲將正太鐵路合同讓歸法國公司

一節實深駭異貴行既有此意何以合同之內並未聲明況當商議合同之時本大臣係奉外務部來文正太鐵路係與貴行議辦今忽事後更變與原案不符本大臣礙難應允除將來函咨商外務部應俟接到部復再行定奪等語函復去後頃該行又來催請電告貴部核定謹先電達

又十一月十一日

詢佛郎威道勝合同何故讓法據稱銀行辦路名實不稱與中國商量辦事仍係道勝法公司董事卽銀行董事惟無權繕函爲憑等語查合同載明借票由駐法大

臣蓋印明係在法賣票俄法相等如另立公司別無他意合同不動似無所礙倘欲更改合同或另生枝節斷不能允佛郎威畫押後毫無權柄此事本屬璞科第倣主璞不來滬應請傳璞詰問如與佛言相符別無他意似亦須令璞科第繕憑呈交大部立案第二十六款載總公司與該銀行或有爭執情事呈由大部與俄使評斷應否一詢俄使乞鈞裁

外務部來電

十一月十五日

璞科第稟稱道勝承辦鐵路不能親手自修擬在法京設一修路開車法國公司諸事遵聽中國政

府訓示如有不合道勝承飭轉令就範可否准其
照辦希札復等因查正太一路中國係與道勝訂
立合同諸事只認與道勝辦理法公司係道勝轉
設究屬歧出希酌妥電復以便復璞

寄津袁宮保

十一月十七日

船局仍歸北洋主持俾得奉令承教華商兩公司可留
其一鐵廠既無挹注何能久支萬分焦急面求借款廠
電統歸官辦一節承允到京代籌能否照准乞示

袁宮保來電

十一月十八日

歸來忙且病正擬詳商先奉霰電悉船電鐵三政

奉尊意周旋船事照在滬與沈楊兩公所商附片
奏明以安商心業奉 硃批仍請遇事指示電事
承囑二百四十萬收回內意嫌太多故有估計之
命南皮當不至格外挑剔俟收清後一切仍舊並
擬請公襄助化商爲官公免受累受謗鐵事先與
樞說明並詳細面奏指廠借十兆擴充整頓以保
大利並述公言如上的不信我可請另簡員辦或派
伍廷芳接 君相均許可命與南皮妥商惟此老
在甯謂鐵廠尙可支持難與措辭尙未寄電如公
有善詞請速示

又十一月十八日

此行察看內情公受病惟在船電人注意亦在此
謀者尙不止留侯廠事無人注意經詳細陳說力
請維持始得動聽如南皮同見必可有成以公才
資久當開府困於庶事實在可惜果能趁此擺脫
清楚亦同志之幸也請公留意

寄京陳瑤圃侍郎 十一月十九日

電綫歸官商情震動如不給現款恐股票爲外人得連
海綫墊款估計甚鉅部款已否籌定乞速電示

寄天津袁宮保江甯張宮保 十一月二十日

頃接香港商董溫灝等公電大局忽變眾商寒心老商
猶可新商貴價所買何堪受累職道等經招各股雖係
華商多隸外籍若未發還股值遽爾收盤誠恐別生枝
節等語擬卽答以 諭旨看法似係估計後奏請籌款
發還商股後再將各電局收回派員經理並無未還股
值遽爾收盤之意南北兩帥正在振興商務開章第一
義自必體恤商情斷無抑勒幸勿誤會希速傳諭各股
商以安商心等語是否有當乞速示遵

濟南周玉帥來電

十一月二十一日

商電歸官不知誰創此議請公與袁張二公妥議

以顧大局勿失商民心

王中堂來電

十一月二十一日

電綫歸公戶部恐難籌款時局翻騰尙不知伊於胡底也

袁宮保來電

十一月二十一日並致張香帥

估計發價後再行收回自爲一定辦法請轉諭諸商毋過慮其估計辦法應由杏公先將綫路里數局數料物產業存數各綫修理年數商股新舊各若干各省協撥公款若干詳細示知以便南北會委查估至各局員銜名請開示均令照舊辦事鄙

愚齋存彙

卷五十九

宣統三十六

三

世北補樓書房

見如斯仍請香公核政迅復

寄袁宮保

十一月二十四日

船電鐵三事俱蒙大力維持 國家之幸亦宣之幸也
電事收歸官辦商情雖多惶急責宣不先集商會議遽
與公謀昨已將估計發價後再行收回之 諭傳示商
董矣廠借十兆南皮未必不願但借款不能無抵押此
實爲難宣近患肝病耳痛俟稍愈與廠員妥商再詳達
又十一月二十五日

頃據局員面商鐵廠不難在抵借難在抵借而權不外
侵恐公與南皮皆不願外人執權容再細酌

寄外務部 十一月二十五日

奉刪電後卽與道勝理論頃據佛郎威函稱接到巴黎北京函電准佛聲明下陳各節一本行所以將山西鐵路合同讓與法國路工行車公司者因銀行不能兼辦鐵路故特設立法國公司名雖不同其所有董事仍係銀行董事一本行雖另立公司而在中國仍係道勝代該公司經理一切一本行應擔保該公司遵照已訂合同辦理一約明已訂合同絲毫不能更改今本行既聲明以上各節敢請迅賜電請外務部核准等情查合同不改在中國仍係道勝代該公司經理最爲扼要應請

貴部再與璞科第妥籌繕憑立案

寄天津袁宮保江甯張宮保 十一月二十五日

港商公電係未奉發價後再行收回之 諭故多疑慮
摺開之數與外間股價不相上下如欲核減則不及十
三以前票值商情所惶急者在此商董並求商電局係
三月開辦請照向章三月結帳派利後發價收回頭緒
清楚雖稍核減派利後較可允洽會議開單派員估計
復奏籌款似亦需時聞外洋官收商業必有限期六個
月乃至速等語乞速電復以便轉諭遵照此事歸官出
於本願既已籌定款項宣必不置身事外總當如期了

結交清潔身而退庶可告無罪於天下外閒謠言可勿聽也

寄張宮保 十一月二十五日

英德合造津鎮路約二十五年竹筠燕謀議定已礙廬漢下游今福公司欲另造澤州至浦口鐵路更礙廬漢中權若遽允准廬漢本利每年二百萬斷還不起並加澤浦債斷無如此辦法彼族但知爲自己謀利絕不計及中國還債爲難居心直不可問英使屢向外務部力爭宣力阻止近奉部咨哲美生復來請議尙推拒未見鄙見全國應造縱橫幹路枝路均應預爲繪圖測估分

別緩急先後定於若干年造成豈容築室道謀歧路紛
擾況國債所關不淺實未便畏難遷就正在鈔案奉商
務求鼎力設法阻止不僅關係盧漢也

張香帥來電

十一月二十五日

聞尊處現與英德兩國議訂津鎮鐵路合同並擬
展綫至甯屬之浦口爲發端處未知確否所議條
款可得聞否祈示復

袁宮保來電

十一月二十六日並致張香帥

滬徑電悉估定發價自非急切所能了三月結帳
派利後收回似尙可行但爲時稍久應須奏明如

香帥允可祈卽復以便會名電樞聞商股多有不
願抽回者愚意收回後仍准其搭股數成另換新
票但不准過官本之數亦不准洋人附股兩公於
意如何

又十一月二十六日

鐵廠必須全力維持又須就鐵或就煤擴充新廠
已在宮樞前諄切陳明但借款以礦廠作押則可
由外人執權則萬不可現應先與南皮商明願否
借款擴充再議辦法公意如何

沈子梅觀察上袁慰帥電

十一月二十六日

電局一切事權專歸督辦之員已成多年局面不
過以股商資本不得不以商綫爲名實則大權早
已在官祇在遞派經理大員卽是收管其事亦合
命意倘可約畧敷陳則轉圜無痕遠近滋議自息
併請俯察

袁宮保復沈道電

十一月二十七日

兩省電悉卓見甚佩但須徐圖轉圜昨已電商香
杏兩公准搭商股一半尙未得復

袁宮保來電

十一月三十日

香帥來電不以官收爲然議由商辦而另章恐商

不能辦電事太煩斷非疆吏所能兼顧北洋萬難主持將來必須專設電政大臣方免遺誤

張宮保來電

十二月初三日

電事本由慰帥主政前有電來商因將鄙意但限商權不奪商利辦法請其斟酌嗣得復電慰帥意不謂然故此議未卽奉達今慰帥旣已述知鄙意茲將敝處原電摘要錄出另函郵寄台覽總之此事當悉聽北洋處置

寄張宮保

十二月初四日

據璧利南云英德路請改浦口爲起點彼卽到甯稟商

滬甯又改數處已另咨核哲美生昨議澤浦路駁以一
礙盧漢下游二另借四百五十萬鎊六十年分還本息
甚鉅北幹連津鎮分作三條恐還不起哲堅執不礙盧
漢並云薩使已向鈞處商允未知薩在甯面議如何乞
鈞示

張宮保來電

十二月初五日

澤浦鐵路本年正月間漢口英領事接薩使電謂
敝處從中阻止當答以福公司合同既非敝處與
議不知其詳以後又未奉 旨交議無從過問況
澤浦一路均在河南江蘇不在湖廣轄境之內敝

處不能干預敝處意見無足重輕總之敝處不管
此事等語迨領事送來辦法兩條堅請轉達當於
正月馬電照轉此後並無所聞此次薩使來甯亦
未提及何從遽與商允爲盧漢計昨尊處送來沙
多節略最爲扼要之論卽請相機因應並商外務
部路礦總局爲禱至敝處前在湖北固不能過問
卽此時暫在江南然不日卽須回鄂亦不干預其
事也

寄外務部 十二月初五日

據華俄銀行佛郎威函稱接璞科第電外務部已核准

正太合同歸法公司承受惟在華仍係華俄銀行代爲經理並擔保按照會合同辦理等因事已辦結懇卽電請貴部按照合同第二款電告駐法大臣簽印借票前來查正太借票已將核照盧漢辦法並將總公司印花簽名先行咨送孫使在案乞再詢明璞科第核明辦理

張宮保來電

十二月初六日

甯滬鐵路合同就鄙見應添改以保權利者九條一借款先九扣按虛數息五釐銀公司又分餘利五分之一購料又得行用五釐利益已經極厚鐵路隨時需款銀公司自應肩承卽時撥付隨時需

用由總公司給予小票若干銀公司卽時照數墊付不必待售小票不應加息至六釐二應訂明總公司發給小票後若干時銀公司卽行照數撥款倘屆期不能應付貽誤工程應載明重罰以免中國喫虧利息三鐵路五年竣工亦應訂明逾期有罰四中國借款造路受此大虧折復由國家擔保又以路產作押借到之款應是我款除不能還利路歸外人收管外鐵路應是我路其權應由我自操今第六款每年還利中國總公司之權尙不如銀公司之權之重總辦管理處共五員華二洋

三太不平允若謂借銀人應保其餘利五分之一則應按餘利分數派人只可華四洋一至多亦須改爲華三洋二方妥五既係中國鐵路總工程司應由銀公司保薦由督辦派定且必須聲明歸督辦節制如有不合隨時可以更換以保路權六第十款保路巡捕兼用華洋弁目尤關緊要應改爲只用華人充當弁目以免他處效尤七第四款在英國所存購料之款應一律聲明生息八第七款鐵路產業地基以及出入款項 國家概不收稅於將來印花等稅有礙亦宜酌改九此項借款借

銀人利益甚多中國官商富戶必願購買小票應
於合同聲明留若干在中國分售先儘華人以冀
略收利權以上九條準情酌理皆極公平並非格
外苛求除在甯與璧利南面商外俟其回滬應請
尊處極力磋商爭得一分即得一分之益

外務部來電

十二月初六日

法公司代辦正太鐵路事已據佛郎威所陳各節
早據璞科第具呈到部准予立案希查照

寄長沙俞中丞

十二月初七日

項城過滬力勸解去利柄到京卽有收回電綫整頓招

商之舉在制本應去差但以後華商恐更寒心官辦電綫尤不利軍務勘礦應請各省自辦以後恐無力相助滬上煽惑尙無所聞

寄張宮保

十二月初九日

歌電甯滬鐵路合同應改九條均極和平璧利南進謁時請將大概切實諭改俟其到滬再與磋商目前多喫一分力將來少喫一分苦經公指示無不竭力

張宮保來電

十二月初九日

甯滬鐵路事宜現與璧利南議定將合同略爲添改一總冊內恭錄十一月十三日電 旨全文一

第五款內督辦大臣核准而行下添第一次鐵路工程估計需款若干卽照數在倫敦發售小票其第二次以及下餘各次小票於未發售之先銀公司須預先知照中國駐英大臣俾中國國家遇有款項可以撥交總公司歸入鐵路帳內與售賣小票之借款一律支用如中國國家果有撥款則三百二十五萬鎊之數卽照撥款若干扣減等字又枝路之用下添第二次以及下餘各次小票將發售之時倘督辦大臣預先告知銀公司中國人民願購買小票若干銀公司應照數留與華人小票

若干張照在倫敦發售者一律章程價值售賣倘有法可設應設法在中國發售此項小票給還此項小票利息均照是日磅價折合等字一第四款未用之先按期生息下添倫敦所存借款未用者亦一律生息等字一第六款中國人員兩員下改爲一由督辦大臣選派一由鐵路經過省分督撫會同督辦大臣選派等字又預先稟商督辦大臣下添除總辦管理處各員外南洋大臣可另派一員官階與總辦管理處之華員相等其職任係爲稽查帳目工程辦事各情形稟報本省大憲總辦

兩使復以該段鐵路有妨盧漢礙難准行等情照
會到部尊處現與哲美森商議若何希詳晰電復
寄外務部 十二月十七日

恭讀邸鈔奉 上諭着將中國所有電綫核實估計奏
請籌撥款項發還商股即將各電局悉數收回等因欽
此欽遵查電局光緒六年開辦八年英法德美擬在滬
設萬國電報公司將海綫迤邐造至各口李中堂奏派
招商自造南北陸綫責成堅拒當拆其粵滬僭造之綫
只准水綫至閩滬口外爲止嗣俄請造怡綫命商籌本
造成不准俄綫越界先訂三公司齊價合同又與俄丹

及美法訂接綫合同不侵入界交涉始定凡遇軍務洋
務皆以保全電綫接遞官報爲主義庚子年綫皆阻斷
行在至京京至各省電難通達上海局各國領事慮
有礙彼軍務欲圖佔踞因宣懷與議訂保護東南之局
開導中止烟台局已爲德兵佔旋卽索回洋人將設海
綫至煙津如聽其所爲彼通我塞和議大不便不得已
重餌將海綫購回造至大沽並代造陸綫至京遂四面
貫通其時宣懷在滬承轉機密電 旨電奏數百件毫
無延漏悉赴事機直至 回鑾又令華商趕造驛路電
綫艱難危急之秋華商不惜鉅資不辭勞苦各員均蒙

天恩優獎而股商之奮力報効未及上聞 黼座也
本年收復天津卽向索還京津陸綫英俄使助商要挾
將欲永遠代管幸仗 天威甫經收轉近來法水綫由
廣州灣至廈門德水綫由青島至煙滬其鐵路均造陸
綫正欲阻其不打商報美水綫亦將來滬俄踞東三省
綫亦正議收還此歷年辦事情形也陸綫三萬四千五
百餘里連加至五綫四綫三綫二綫合計六萬四千餘
里陸綫商本銀二百四十五萬兩局一百九十三處房
產材料一切在外海綫洋債英鎊合銀約二百四十五
萬兩商已墊還五屆計發商股票二萬二千股票面每

股一百元經營二十餘年利息始厚市售票價一百六七十至少售一百五十此商股計值之實數也香港商董電稟經招商股雖係華商多隸外籍若未發還股值遽爾收盤誠恐別生枝節等語當卽答以 諭旨係估計後奏請籌款發還商股後再將各電局收回派員經理並無未還股值遽爾收盤之諭請示南北洋當接張大臣電云但限商權不奪商利接袁大臣電估計發價後再行收回自係一定辦法又電云估定發價自非急切所能了俟三月結帳派利後收回似尙可行現已照此通飭各局轉諭股商以 朝廷正在振興商務自必

體恤商情斷無抑勒以安商民之心惟聞各埠商情震動票價大跌誠恐洋商乘機購買除諭令商董剴切登報不得將股票售與外人勸令靜候發價並札滬道照會各領事禁止收買電票外惟商股港粵居多應請大部一律照會各使通行各埠以備抵制

又 十二月十九日

篠電謹悉與哲美森面議詰以兩端一盧漢每年須還本利二百萬兩如何方能不礙其路利二澤浦合同又擬借四百五十萬鎊本利太鉅現在國債已多如何方能就路籌還據哲美森復稱津鎮路造成長江下游貨

客已歸津鎮此路已無盧漢生意可奪至第二層未來之事誰能逆料安徽有米可運加以煤鐵運腳當能自養又稱正太已准則澤浦亦應准等語當卽告以正太係枝路且有益如福公司亦只由澤州造至衛輝接上幹路運漢便與正太相同彼云運漢不如運浦又告以中國若願借四百五十萬鎊鉅款造一互相窒礙之路不如另外覓造單行之路足資自養又免分奪據賈道景仁云若准另造一有用之路可獲利益者彼似可允停止此路論大局若照各國造路必先擇造 國家應造之路決不費鉅款造無益之路况借債乎除將問答

節略呈核外頃已告知專候鈞復再議如必欲議允澤浦擬令沙多來滬會議以免比法藉口乞鈞裁示

外務部來電

十二月二十四日

澤浦路既礙盧漢自難照允惟此路由澤襄而起改道既不准行原案終難作廢若得澤浦商停另覓單行之路聽其自擇深恐窒礙仍多應先自行相度地勢何路最爲無礙擇定一處再與議改希統籌妥酌仍電復

袁宮保來電

十二月二十六日

聞南洋公學已罷散能否趁此停辦或請南洋另

籌款請酌

寄張宮保

十二月二十七日

璧利南回滬後訂明將甯改定八條電致倫敦不再添
改頃接璧函稱滬甯路約怡和已接倫敦公司復電准
其聯同匯豐在滬卽行簽字已趕備英文五分望貴大
臣早日定期彼此簽字等語當復以卽日電請張宮保
會同核奏俟奉 旨後方能簽字云宣前蒙留辦鐵路
電奏內陳明凡事皆由督臣暨盛會同陳奏此件似應
由鈞處主稿抑仍由敝處擬呈核定乞速示

又 十二月二十七日

從前蒙公以鐵廠相屬宣稟請先招商股再行接辦公
以宣有輪電在手勸諭先接數年來兩局附股借資輔
助甚鉅禮和洋款並以輪產作保幸無干預曾蒙公奏
明在案今夏面商續借禮款將爲大冶加爐萍鄉運駁
嗣因禮欲指實輪產抵保乃止慰帥來滬力主擴充曾
託鄭道面稟調回李維格與洋商試議借款大約就廠
礦抵借則廠礦之權利必屬於彼難免隳公締造初心
然不借款則煤不能運爐機不能添日煉鋼鐵數十噸
售價不敷煉本接濟已斷人情勢利挪借俱窮必致牽
連顛敗負公厚望萬死莫贖晝夜焦思北洋現設國家

銀行包涵甚廣自必統中國財政出於一途通商銀行
斷站不住擬卽聲明禮和借款中止請將該行商股二
百五十萬兩作萍礦商股部款一百萬兩原議二十九
年起按年分還二十萬兩三十三年還清擬請暫撥鐵
廠按年發息一如常例廠礦得此交濟互用可紓目前
之急查銀行二十三年亦經鈞處會同奏復現在改章
如蒙許可擬請會同電奏以期妥速乞鈞示

張宮保來電

十二月二十八日

萍礦鐵廠用款擬以通商銀行官商股本撥用甚
善惟袁慰帥前與尊處議擴充辦法似是提借款

五百萬計尙短百五十萬是否足敷周轉如尙不敷莫如趁此時再借定洋款百五十萬或百萬以期一氣呵成用則提不用則止爲數較少當可以礦廠作保而不作抵若留以有待以後再奏較難矣慰帥允爲維持尊處似可託其從中助力或無須再定之處統祈酌定

張宮保致軍機處電

十二月二十八日

盛大臣現丁父憂所有盧漢粵漢鐵路總公司事宜關係最爲重大此事外關交涉內關政權甚不易辦稍有疏漏權利卽暗爲外人侵奪把持全國

受制悔不可追洞深知其艱難又深知其危險此兩路皆係盛大臣與洋人訂立合同盛情形已熟經理俱有斟酌且有招商局碼頭作抵借款修造萍鄉鐵路等事膠葛甚多實未便更易生手查鐵路既由總公司議立合同本係商務中事故盛之銜只稱爲督辦鐵路總公司大臣與別項督辦大臣不同丁憂人員似仍可承辦擬懇由鈞處請旨將督辦盧漢粵漢總公司事宜以及淞滬鐵路仍責成盛大臣一手經理勿任諉卸如慮奏事不便或改爲署任盛所督辦者係鐵路總公司其鐵

路事宜仍由南北洋大臣暨湖廣兩廣各總督會同督辦四督臣係督辦鐵路事務凡事皆由四督臣暨盛大臣五銜會同陳奏盛所督辦者係總公
司籌款購地買料修工事宜督臣所督辦者係鐵路經過地方政治兵政稅項利權事宜須請 旨劃清界限兩者既能相輔亦不相妨較爲周妥以後鐵路雖廣既有各督臣督辦會奏亦不慮盛一人事權過重精神難周洞係創議開辦盧漢粵漢鐵路之人於此事利害旣已確有所知不敢不十分慎重數日來焦慮殊深茲爲要工得人起見謹

據實詳籌奉商應否奏聞請鈞酌並望示復

寄張宮保

光緒二十九年正月初四日

甯滬合同太長似難電奏已趕辦會疏呈請核定萍礦
函須將醴陵鐵路接至湘潭並造輪船由潭拖漢得銀
行股二百萬煤焦運道可暢通矣漢廠得部款百萬亟
須添購機軸等項五十萬卽是奏派李維格出洋購辦
者並立大冶添爐基址以後就鐵開爐設新廠並還禮
和及盧漢部款至少需借五百萬慰帥面奏擬借十兆
所省不過二百萬鈞意莫如趁此時再借定洋款以期
一氣呵成仰徵卓識然此時就廠借款欲求外人不執

權甚非容易俟銀行部股兩款歸并後萍運冶爐大致就緒廠礦局面見利在即借款較易歆動謹擬會電稟如下宣前奉宥電鐵廠必須全力維持又須就鐵或就煤擴充新廠已在宮樞前諄切陳明足見公以天下爲心開物成務莫名欽佩現商洞亦極願擴充深望我公助力惟尊電借款以礦廠作押則可由外人執權則萬不可尤屬扼要屢商各國猝難就緒萍鄉前借禮和洋款爲數不多並以招商局房產作保始免執權今夏續借禮款將爲大冶加爐現已中止若不趕緊設法則煤不能運爐不能添日煉鋼鐵百噸左右勢難支持因思

北洋現設國家銀行包涵甚廣通商銀行業已無足重輕拳亂時京津拖欠九十餘萬正須收拾擬令商董會議卽將商股二百五十萬兩改作萍鄉商股部款一百萬兩原議二十九年分還二十萬三十三年還清擬請暫撥鐵廠查已借撥五十萬仍一并由廠按年計息一如前議得此歸并三百萬現款可使醴潭鐵路成功煤焦通運並在大冶添置一爐洋人知我不亟亟於借款見利在卽乃能抵保一面再議借數百萬兩多添爐座擴充新廠並歸還禮和初次押款及部款百萬庶有步驟不致爲彼挾持公巧電面奏指廠借十兆擴

充整頓以保大利今若得移銀行三兆先作底本續借六七兆洋款一氣呵成更有把握此事關係自強大計洞創其始因從前戶部不願籌款乃奏令宣繼其後今商力又告乏公允爲維持非藉鼎力何能宏此遠謨如以爲然乞示復以便擬稟呈請核奏云乞費盡神酌改電示卽行發遞

寄袁宮保

正月初六日

南洋公學十月間諸生與教習小有口舌旋即安靜並未罷散近來學堂風氣各處似此頗有所聞報紙張大其詞皆係妄說宣謗陋何足言教育惟奏准開辦已六

年中外觀聽所繫若遽廢止殊覺難堪公以天下自任
且創議學堂章程諒亦有心維持無分畛域現擬將譯
書院東文學堂及特班師範班全裁商務學堂亦緩辦
只留中院生六班以二百人爲度歷年節省稍有存款
數萬姑暫收束緊做一面另行勸募惟津滬兩堂學生
在英美等國肄業者十五六名歲需經費約三萬兩查
輪電兩局原撥公學每年十萬兩本年起遵卽停撥又
船局另捐二萬兩電局另捐二萬元原奏係充商務學
堂東文學堂各經費擬請暫准照撥改充出洋肄業經
費使卒業諸生不致半途而廢皆出公賜可否准行伏

候電示

寄京外務部津袁宮保吳侍郎

正月初七日

紐約太平洋商務水綫公司函稱請俯允於上海或附近上海之處准將水綫上岸並傳遞電報此綫係由小呂宋接放以便與現在敝公司擬設之舊金山至小呂宋水綫相接敝公司稔知大東北兩公司在中華得有辦理水綫之權故已將此事函商該兩公司懇其允准想可應允以便敝公司將應用之水綫趕緊製造等語查光緒八年英法德美各使請在滬設萬國電報公司擬添由滬至香港各口海綫英署使格維納並援同治

九年總署已允成案添設自上海並甯波溫州福州廈門汕頭各口海綫李中堂奏派宣懷招商自造南北陸綫責成堅拒當拆其粵滬僭造之上岸陸綫只准其水綫至閩滬口外爲止而我華綫亦得至香港設局嗣俄請接造恰綫命商籌款造成不准俄綫入界先訂三公司齊價合同又與俄丹英法訂接綫合同交涉始定並得分收其水綫出洋報費爲一大宗今美綫來滬中美交好勢難拒絕似應查明大東北水綫合同妥籌辦法以保利權

袁宮保來電

正月初八日

輪電兩局各撥南洋公學常年經費十萬兩本年
起應卽停撥其船局另捐二萬兩電局二萬元卽
遵示暫改充出洋肄業經費

袁宮保吳侍郎來電

正月初九日

虞電蘊籌極密憲月內來滬與公妥商辦法請先
函復該水綫公司候憲到酌定

寄袁宮保

正月十四日

前奉宥電鐵廠必須全力維持又須就鐵或就煤擴充
新廠已在宮樞前諄切陳明足見公以天下爲心開物
成務莫名欽佩昨商香帥亦極願擴充深望我公助力

並囑宣徑行電商尊處惟尊電借款以礦廠作押則可由外人執權則萬不可屢商各國猝難就緒萍鄉前借禮和洋款爲數不多並以招商局房產作保始免執權去年續借禮款因商局改章中止若不趕緊設法則煤不能運爐不能添日煉鋼鐵不及百噸接濟已斷勢難支持數月以來晝夜焦慮北洋現設 國家銀行包涵甚廣通商銀行似已無足重輕拳亂京津拖欠數十萬正須收拾擬令商董會議即將商股二百五十萬兩改作萍礦商股利益較勝當無不願部款一百萬兩原議二十九年起按年分還二十萬三十三年還清擬請暫

撥鐵廠查已借撥四十萬仍一并由廠按年繳息一如
前議得此歸併可使醴潭鐵路速成煤焦通運並在大
冶添置一爐洋人知我不亟亟於借款見利在卽乃能
抵保一面再議借數百萬擴充新廠並歸還禮和初次
押款及部款百萬庶有步驟不致爲彼挾持公面奏指
廠借十兆今若得移銀行三兆先作底本續借洋款不
致空談此意已電商香帥謂先借通商銀行款後借洋
款以免外人執權慮患甚遠並謂公於宮樞前已經陳
明奏入無虞不准惟念此事關係自強大計香帥創其
始官款不繼宣承其後力又告乏幸公慨允維持非藉

鼎力何能宏此遠謨如以爲然擬請公引申面奏之意
領銜電奏無任感禱卽乞示復

寄外務部

正月十四日

據道勝滬行佛郎威函稱正定至太原支路山道崎嶇
地質駁雜不宜安寬軌照工程司繪圖擬用一法尺合
華尺三尺三寸窄軌因新約未載專函聲明等語已復
以正太係盧漢支路支幹必須一律萬難照准該行又
來面議開辦之初因山洞工艱應先造窄軌惟土工橋
工均預備寬軌俟得利後展寬法國有此辦法又駁以
通國軌道尺寸宜畫一正太非小支路可比且議訂合

愚齋存稿

卷五十九

作集三

二

三

愚齋存稿卷第五十九